

續


通

典

刑典

刑制下

第二冊



元太祖頒條畫刑獄惟重罪處死其餘雜犯量情笞決
太宗六年五月大會諸王百僚諭以條令凡當會不赴
而私宴者斬軍中凡十人置甲長聽其指揮專擅者論
罪其甲長以事來宮中即置權攝一人甲外一人二人
不得擅自往來違者罪之諸公事非當言而言者拳其
耳再犯笞三犯杖四犯論死諸千戶越萬戶前行者隨

以木鏃射之。百戶甲長諸軍有犯其罪同。不遵此法者。斥罷。凡來會。用善馬五十匹為一羈。守者五人。飼羸馬三人。守乞烈思三人。盜馬一二者。即論死。諸婦女製質。孫燕服不如法。及妬者。乘以驕牛。徇部中論罪。即聚財為更娶。世祖中統元年。禁私商不得越境。犯者死。二年。諭諸王駙馬。凡民間詞訟。毋得私自決斷。皆聽朝廷處置。四年。詔諸路私造軍器者處死。凡民間所有不輸官者。與私造同。至元二年正月。申嚴越界販馬之禁。違者處死。五月。令軍中犯法。不得擅自誅戮。罪輕斷遣。重者

聞奏。六月。勅行院及諸軍將校卒伍。須正身應役。違者罪之。十月。詔隨路私商。曾入南界者。首實免罪。充軍。五年三月。申禁民間兵器。犯者驗多寡定罪。十二月。詔諭四川行省。沿邊屯戍軍士逃役者處死。禁市烏頭砒霜。諸毒藥。及不通醫理。妄行鍼灸。或為婦人墮胎。戕害人命者。加等治罪。八年。勅凡訟而自匿。及誣告人罪者。以其罪罪之。禁用金泰和律。元初新格未行。猶用金律。至是禁之。十年五月。詔主守失陷官錢者。杖而釋之。十月。勅伯顏和禮霍孫。以史天澤姚樞所定新格。參考行之。

十二年二月。禁民間賭博。犯者流之北地。十月。中書省臣議斷死罪。詔自後殺人者死。罪狀已白。不待時行刑。奴婢殺主者。具五刑論。十四年五月。申嚴大都酒禁。犯者籍其家貲。散之貧民。七月。勅犯盜者皆棄市。符寶郎董文忠言。盜有強竊。賊有多寡。難以悉寘于法。帝遽命革之。十一月。詔偽造寶鈔。同情者並處死。分用者杖之。十五年正月。禁官吏軍民。賣所娶良家子女及為娼者。賣買者兩罪之。官沒其直。人復為良。復勅官吏擅易馬匹。私配婦人者。沒其家。軍官不能撫治軍士。及役擾致

逃亡者。沒其家貲之半。五月。定諸職官犯罪。受宣者聞奏。受勅者從行。臺處之。受省札者按察司治之。其宣慰司官吏姦邪非法。及文移案牘。從本道提刑按察司磨刷。應有死罪。有司勘問明白。提刑按察司覆審無寃。依例結案。類奏待命。十六年三月。勅中書省。凡掾史文移。稽緩一日二日者杖三日。者處死。八月。詔漢軍出征。逃者罪死。籍其家。十一月。勅諸路所捕盜。初犯賊多者死。再犯賊少者。從輕治罪。十七年十一月。詔有罪配役者。量其程遠近。十八年。立登聞鼓院。許有寃者。搥鼓以聞。

先是十二年四月。諭中書省。議立登聞鼓。如為人殺其父母兄弟夫婦。寃無所訴。聽其來擊。其或以細事妄擊者。論如法。至是始立焉。十九年九月。勅官吏受賄。及倉庫官侵盜。臺察官知而不糾者。驗其輕重罪之。中外官吏贓罪。輕者杖決。重者處死。言官緘默。與受贓者一體論罪。十月。耶律鑄言。前奉詔殺人者死。仍徵燒埋銀五十兩。復止徵鈔二錠。其事太輕。請依蒙古人例。犯者沒一女人仇家。無女者徵鈔四錠。從之。又令天下重囚。除謀反大逆。殺祖父母父母妻殺夫。奴殺主。並正典刑外。

餘犯死罪者。充日本占城緬國軍。二十年正月。令自今以匿名書告事。重者處死。輕者流遠方。能發其事者。給犯人妻子。仍以鈔賞。四月。申嚴酒禁。有私造者。財產女子沒官。犯人配役。尋以歲登開其禁十二月。令凡盜為首及同謀者死。餘屯田淮上。二十一年四月。括天下私藏天文圖讖。太乙雷公式。七曜歷。推背圖。苗太監歷。有私習及收匿者罪之。二十三年四月。中書省臣言。比奉旨。凡為盜者。毋釋。竊鈔數貫。及佩刀微物。與童幼竊物者。悉令配役。今議一犯者杖釋。再犯者依法配役為宜。帝曰。朕

以漢人徇私。用金泰和律處事。致盜賊滋衆。故有是言。今後非詳讞者。勿輒殺人。二十四年。詔憲臣有貪婪敗度者。付法司增條科罪。以懲欺罔。二十八年。頒行至元新格。元刑制名例四條。衛禁八條。職制三百七條。祭令五條。學規十三條。軍律十二條。戶婚六十九條。食貨三十六條。大惡五十一條。奸匪五十九條。盜賊一百十四條。詐偽五十條。訴訟二十二條。鬪毆四十二條。殺傷一百六條。禁令一百一十一條。雜犯十四條。捕亡九條。恤刑十五條。平反四條。五刑之制。笞刑六。自七下遞加十。至

五十七。杖刑五。自六十七遞加十。至一百七。徒刑五。自一年遞加半年。至三年。凡徒一年者。杖六十七。遞加十。至一百七。流刑三。曰遼陽。曰湖廣。曰迤北。死刑二。曰斬。曰凌遲處死。獄具制。枷長五尺以上。六尺以下。濶一尺四寸以上。一尺六寸以下。死罪重二十五斤。徒流二十斤。杖罪十五斤。皆以乾木為之。長濶輕重。各刻誌其上。手杻長一尺六寸以上。二尺以下。橫三寸。厚一寸。鎖長八尺以上。一丈二尺以下。鐐連環重三斤。笞大頭徑二分七釐。小頭徑一分七釐。罪五十七以下用之。杖大頭

徑三分二釐。小頭徑二分二釐。罪六十七以下用之。訊杖大頭徑四分五釐。小頭徑三分五釐。長三尺五寸。並刊削節目。無令筋膠諸物裝釘。應決者並決小頭。其決笞及杖者。臀受。考訊者。臀若股分受。務令均停。二十九年二月。申禁鞭背法。三月。中書省御史臺奏定贓罪。十三等。枉法者五。不枉法者八。罪入死者。以聞。制可。三十年二月。以江南豪右。多庇匿盜賊。令為首者誅。餘徒內縣。成宗即位。御史臺言先朝決獄。隨罪輕重。笞杖異施。今止用杖。乞如舊制。不允。元貞元年。定職官坐贓論斷。

再犯者加二等。倉庫官吏盜所守錢糧。一貫以下笞之。至十貫杖之。二十貫加一等。一百二十貫徒一年。每三十貫加半年。二百四十貫徒三年。滿三百貫者死。計贓以至元鈔為則。二年正月。諭諸王公主駙馬。非奉旨毋罪官吏。先是中統二年。及成宗時。屢詔諸王以下毋私決有罪。而風猶未格。至是復申前禁。二月。禁軍將擅易侍衛軍蒙古軍。以家奴代役者罪之。又詔軍卒擅更代及逃歸者死。六月。御史臺臣言官吏受賂。初既辭伏。繼以審覈。而有司徇情。致有異詞者。乞加等論罪。從之。十

月。詔職官坐贓。經斷再犯。加本罪三等。大德元年五月。詔強盜姦傷事主者。首從悉誅。不傷事主。止誅為首者。從者刺配。再犯亦誅。六月。詔僧道犯姦盜重罪。聽有司鞫問。二年二月。詔僧人犯姦盜詐偽。聽有司專決。輕者與僧官約斷。約不至者罪之。七月。詔諸王駙馬及諸近侍。自今奏事不經中書。輒傳旨付外者罪之。三年三月。命何榮祖等更定律令。四年正月。申嚴京師惡少不法之禁。犯者黥刺。杖七十。拘役五年。正月。令官吏犯贓及盜官錢。事覺避罪逃匿者。事同獄成。雖經原免。亦加降

黜。七月。詔禁畏吾兒僧陰陽巫覡道人呪師。自今有大祠禱。必請而後行。違者罪之。十一月。禁軍士萬戶以下。毋令私代。犯者斷罪有差。十二月。定強竊盜條格。凡盜人孳畜者。取一償九。然後杖之。六年正月。詔千戶百戶等自軍逃歸。先事而逃者罪死。敗而後逃者杖而罷之。没入其男女。七年正月。定諸改補鈔罪例。為首者杖一百七。從者減二等。再犯。從者杖與首同。為首者流。復詔凡為匿名書。詞語重者誅之。輕者流配。首告人賞鈔有差。籍沒犯人妻子充賞。三月。定大都南北兵馬司姦盜

等罪。六十七以下付本路。七十七以上付也。可札魯忽赤。復定凡子孫或因貧困。或信師巫邪說。擅發祖父墳墓。移棄尸骸。貨瑩地者。與惡逆同罪。十一月。命依十二章。斷僧官罪。八年三月。詔軍官擅離所部者。悉遣還翼。違者論如律。軍人不告所部私歸者。杖而還之。十一月。詔內郡江南人。凡為盜黥三次者。謫戍遼陽。諸色人及高麗人。俱免黥。謫戍湖廣。盜禁籜馬者。初犯謫戍。再犯者死。武宗至大元年四月。詔凡匿鷹犬者。沒家貨之半。答三十。二年六月。皇太子言。宣政院先奉旨。毆西番僧。

者。截其手。詈之者。斷其舌。此法昔所未聞。有乖國典。僧俗相犯。已有明憲。乞更其令。從之。三年十月。勅省部官勤恪署事。晨集暮散。苟或怠弛。不必以聞。便宜罪之。其到任或一再月辭以病者。杖罷不叙。仁宗皇慶二年十一月。詔命中書更定畧賣良人罪例。延祐元年十一月。詔省部官有晚至早退。政務廢弛者。視其輕重。杖責之。如更不悛。則罷不叙。二年六月。勅大辟罪臨刑。敢有橫加剗割者。以重罪論。四年十一月。諭諸宿衛入直。非有旨。不得上殿。闌入禁中者。坐罪。五年九月。勅軍官犯罪。行。

泰定下加帝
元年上加泰定

省咨樞密院議擬毋擅決遣。英宗至治二年三月。禁捕天鵝。違者籍其家。漳州路推官上言。律徒者不杖。今杖而又徒。非恤刑意。宜加徒減杖。遂定為令。三年二月。成大元通制。先是仁宗時。取格例條畫。有關風紀者。類集成書。號曰風憲宏綱。至是復命宰執儒臣。取前書而損益之。其大綱有三。曰詔制。曰條格。曰斷例。凡詔制為條九十四。條格為條一千二百五十一。斷例為條七百十七。頒行天下。此據元史刑法志與英宗紀稍異。紀中詔制作詔赦。又有令類五百七十七條。凡二千五百三十九條。泰定即位。詔凡有罪自首者。原其罪。元年六

月。禁蒙古流民。毋擅離所部。違者斬。八月。勅武官坐罪。制授者。以聞。勅授者。從行省處決。二年八月。勅諸王部曲。私入京者。罪之。九月。禁饑民結扁擔社。傷人者。杖一百。著為令。四年九月。禁僧道買民田。違者坐罪。沒其直。命職官贓汙者。流放廣南。先是流遠囚徒。惟女直高麗二族。流湖廣。餘並流奴兒干及青海。至是御史言。廣海古流放之地。請令贓吏處之。以示懲戒。從之。致和元年正月。詔百司。凡不赴任及擅離職者。奪其官。避差遣者。笞之。五月。禁流民聚至千人者。杖一百。文宗天歷元年

十月。以罪人既籍家貲。又役妻子。非古者罪人不孥之意。詔自今凡罪人妻子勿役。三年正月。令自今臣僚有罪。致籍沒者。其妻其子。他人不得陳乞。亦不得沒為官口。六月。更定遷徙法。先是北人徙南。南人徙北。去家萬里。徃徃道死。至是始命應徙者。驗所居遠近。不過千里。在道遇赦。皆得放還。如不悛再犯。徙之本省不毛之地。十年無過。則量移之。所遷人死。妻子聽歸土著。八月。勅自今有以朝賀為名。歛鈔入己者。依枉法論罪。至順元年七月。令各宿衛。復有容匿漢南高麗人。及奴隸濫充

者。集賽

舊作怯薛

官與其長杖五十七。犯者與典給散者。皆

杖七十七。沒家貲之半。以籍入之半為告者賞。仍令監察御史察之。九月。勅諸人非其本俗。敢有弟叔其嫂。子叔庶母者。坐罪。十月。令自今內外官吏家人受財。悉依十二章計贓多寡論罪。二年六月。詔諸官吏在職役。或守代未任。為人行賕關說。即有所取者。官如十二章論贓。吏罷不叙。終其身。雖無所取。訟起減由已者。罪加常人一等。寧宗即位。定婦人犯私鹽罪。初英宗時。王克敬為兩淮鹽運使。溫州逮犯鹽者。以一婦人至。怒曰。豈有

逮婦人千里外。與吏卒雜處者。汙教甚矣。自今毋得逮婦人。建議著為令。至是始定其罪。順帝元統二年七月。詔蒙古色目人犯盜者免刺。至元元年六月。中書省員外郎陳思謙言。強盜但傷事主者。皆得死罪。而故殺從而加功之人。與鬪而殺人者。例杖一百七十。得不死。與私宰牛馬之罪無異。是視人與牛馬等也。法應加罪。因姦殺夫。所姦妻妾同罪。律有明文。今止坐所犯。似失推明。宜令法曹議。著為定制。二年八月。詔強盜皆死。盜牛馬者。劓。盜驢騾者。黥額。再犯劓。盜羊豕者。墨項。再犯黥。

三犯劓。劓後再犯法者。死。盜諸物者。照其數估價。省院臺五府官。三年一審決。三年七月。詔除人命重事之外。凡盜賊諸罪。不須候五府官審錄。有司依例決之。四年六月。令自今處決重囚。五府官斟酌地理遠近。預選官分行各道。蒞其事。六年九月。詔今後有罪者。毋籍其妻女以配人。至正五年十一月。新修至元條格成。六年四月。頒行之。○明太祖初平武昌。即議定律。吳元年十月。令左丞相李善長為律令總裁官。參知政事楊憲。傅瓛。御史中丞劉基。翰林學士陶安等二十人。為議律官。諭

之曰。法貴簡當。使人易曉。若條緒繁多。或一事兩端。可輕可重。吏得因緣為姦。非良法也。十二月。書成。凡為令一百四十五條。吏令二十。戶令二十四。禮令十七。兵令十一。刑令七十一。工令二。律二百八十五條。吏律十八。戶律六十三。禮律十四。兵律三十二。刑律一百五十。工律八。命有司刊布中外。又恐民不能盡知法意。命大理卿周楨等。取所定律令。自禮樂制度。錢糧選法外。凡民間所行事宜。類聚成編。訓釋其義。頒之郡縣。名曰律令直解。洪武元年八月。詔凡決重刑。須待秋後。毋非時以

傷生意。十二月。置登聞鼓于午門外。令監察御史監之。凡民間詞訟。有司不為申理。及冤抑重事。不能自達者。許擊之。御史隨引奏。敢阻告者死。三年六月。詔武臣有犯非奏請不得逮問。五年六月。定宦官禁令。凡內使于宮城內相罵詈者。先發理。屈笞五十。後罵理直者。不坐。不服本管鈴束而抵罵者。杖六十。內使罵奉御者。杖六十。罵門官監官者。杖七十。內使于宮城內相關毆者。先鬪理。屈杖七十。毆傷者。加一等。後應理直而無傷者。笞五十。不服本管鈴束而毆之者。杖八十。毆傷者。加一等。

毆奉御者杖八十。毆門官監官者杖一百。傷者各加一等。內使等有心懷惡逆。口出不道之言者。凌遲處死。知情而蔽之者同罪。知其事而不首者斬。首者賞銀三百兩。作鐵榜誡公侯。申明律令凡九條。一。凡內外指揮千戶百戶鎮撫等。不得私受公侯財物。受者杖一百。發海南充軍。再犯處死。公侯與者。初再犯免罪附過。三犯准免死一次。二。公侯不得私役官軍。違者。初再犯免罪附過。三犯准免死一次。官軍敢輒聽從者。杖一百。發海南充軍。三。公侯強佔官民山場湖泊茶園蘆蕩及金銀銅

鐵錫冶者。初再犯免罪附過。三犯准免死一次。四。各衛官軍。非出征之時。不得輒於公侯門首侍立聽候。違者杖一百。發烟瘴地充軍。五。功臣家管莊人等。不得倚勢在鄉欺毆人民。違者刺面劓鼻。家產籍沒入官。妻子徙置南寧。其餘聽使之人。各杖一百。及妻子皆發南寧充軍。六。凡功臣家屯田佃戶管莊幹辦奴僕及親屬人等。倚勢凌民。侵奪財產者。並依倚勢欺毆人民律處斷。七。公侯除賜定儀仗戶及佃田人戶。已有名額報籍在官。敢有私托門下。隱蔽差徭者。斬。八。凡公侯之家。欺壓良

善。虛錢實契。侵奪人田地房屋孳畜者。初犯免罪。附過再犯。住支俸給一半。三犯停其祿。四犯與庶人同罪。九功臣家不得受諸人土田。及朦朧投獻物業。違者與侵奪田產同科。斷六年四月。刊律令憲綱。頒諸有司。八月。定親屬相容隱律。凡同居大功以上親及外祖父母外孫若孫之婦夫之兄弟及兄弟妻若妾之父母女婿許相容隱。或奴婢為主隱者。皆勿論。其小功以下相容隱。減凡人三等。若無服之親。姑姊妹夫妻之兄弟姑夫妻侄。相容隱者。減二等。謀反惡逆。不在此律。九月。命府州

縣輕重囚獄。即依律斷決。不須轉發。果有違枉。御史按察司究劾之。先是有司決獄。笞五十者。縣決。杖八十者。州決。一百者。府決。徒罪以上。具獄送行省。至是。命中書省。御史臺定議行之。十一月。定大明律。篇目一準於唐。曰衛禁。曰職制。曰戶婚。曰廩庫。曰擅興。曰賊盜。曰鬪訟。曰詐偽。曰雜律。曰捕亡。曰斷犯。曰名例。采用舊律二百八十八條。續律一百二十八條。舊令改律三十六條。因事制律三十一條。掇唐律以補遺。一百二十三條。合六百有六條。分三十卷。明年二月。書成。八年二月。勅刑官

自今凡雜犯死罪者免死輸作終身。徒流罪限年輸作。官吏受贓及雜犯死罪當罷職役者發鳳陽屯種。民犯流罪者鳳陽輸作一年然後屯種。十四年二月詔凡武臣三品以上犯罪奏請得旨乃鞫之。四品以下所司就逮問請旨裁決。若文職有犯干涉武臣三品者亦須奏請毋擅問。命刑部更定徒罪煎鹽炒鐵例各照年限並以到配所之日為始。發鹽場者每日煎鹽三斤。鐵冶者每日炒鐵三斤。另項結課三月。勅官吏受賂必求通賄之人併罪之。徙其家於邊。四月勅刑部自今官吏有犯

宥罪復職榜示其過於門能改過則除之不悛者論如律。十月勅凡戶婚田土作奸犯科諸事悉由本屬官司陳告毋得輒赴京師越訴亦不許家居上封事違者罪之。又詔有以繁文出入人罪者罪之仍命刑科會諸司官定議成式榜示中外。十六年正月令徒流笞杖罪囚代農民力役贖罪役十日。准笞二十杖一十徒流各計年准之。雜犯死罪者罰戍邊三月。定詐偽律。十七年十月。定土官犯罪律。選用者依流官律定罪。世襲者所司不許擅問。先以干証之人推得其實。定議奏聞。杖以下

紀錄在職。徒流則徙之北平。十二月。以民間乞養義女。自幼撫養。有尊卑之分。幃簿不修。實傷風化。比同宗無服之親。律加一等。杖六十。徒一年。其女歸宗。十八年。命刑部錄內外職官犯法。罪狀明白者。揭於申明亭。以示懲戒。初。太祖患民狃元習。徇私減公。罪戾日滋。乃采輯官民過犯。條為大誥。是歲書成。其目有十。曰攬納戶。曰安保過付。曰詭寄田糧。曰民人經該不解物。曰灑派拋荒田土。曰倚法為奸。曰空引偷軍。曰黥刺在逃。曰官吏長解賣囚。曰寰中士大夫不為君用。其罪至抄劄。次年。

復為續編三編。皆頒學宮。以課士。里置塾師教之。囚有大誥者。罪減等。於時天下有講讀大誥師生來朝者。十九萬餘人。皆賜鈔遣還。其後罪人率援大誥以減等。不復論其有無矣。二十年正月。焚錦衣衛刑具。以繫囚付刑部。具寬恕篇二十一年二月。勅有司官入流品以上。犯罪者皆須奏聞。方許逮問。五月。定雲南官吏軍民犯罪律。是歲。詔謀逆姦黨及造偽鈔者。沒貨產丁口。其餘止收貨產。仍以農器耕牛給還之。凡應合抄劄者。曰姦黨。曰謀反大逆。曰姦黨惡。曰造偽鈔。曰殺一家三人。曰採生。

折割人為首。其大誥所定十條。後未嘗用也。二十二年八月。更定大明律。先是刑部奏言。比年條例。增損不一。以致斷獄失當。請編類頒行。俾中外知所遵守。遂命翰林院同刑部官。取比年所增。以類附入。改名例律。冠於篇首。為卷三十。為條四百六十。名例一卷。四十七條。吏律二卷。曰職制十五條。曰公式十八條。戶律七卷。曰戶役十五條。曰田宅十一條。曰婚姻十八條。曰倉庫二十四條。曰課程十九條。曰錢債三條。曰市廛五條。禮律二卷。曰祭祀六條。曰儀制二十條。兵律五卷。曰官衛十九

條。曰軍政二十條。曰關津七條。曰廐牧十一條。曰郵驛十八條。刑律十一卷。曰盜賊二十八條。曰人命二十條。曰鬪毆二十二條。曰罵詈八條。曰訴訟十二條。曰受贓十一條。曰詐偽十二條。曰犯姦十條。曰雜犯十一條。曰捕亡八條。曰斷獄二十九條。工律二卷。曰營造九條。曰河防四條。為五刑之圖。凡二。首圖五。曰笞。曰杖。曰徒。曰流。曰死。笞刑五。自一十至五十。每十為一等。加減杖刑。五。自六十至一百。每十為一等。加減徒刑。五。徒一年。杖六十。一年半。杖七十。二年。杖八十。二年半。杖九十。三年。

杖一百。每杖十及徒半年。為一等加減。流刑三。二千里。二千五百里。三千里。皆杖一百。每五百里為一等加減。死刑二。絞。斬。五刑之外。徒有總徒四年。遇例減一年者。有准徒五年。斬絞雜犯。流有安置。有遷徙。去鄉一千里杖一百。准徒二年。有口外為民。其重者曰充軍。初惟邊方屯種。後分極邊烟瘴邊遠邊衛沿海附近。軍有終身。有永遠。絞斬之外。有凌遲。以處大逆不道諸罪者。充軍凌遲。非五刑之正。故圖不列。凡徒流再犯者。流者於原配處所。依工樂戶留住法。三流並決杖一百。拘役三年。拘役者。流人初止安置。

今加以居作。即唐宋所謂加役流也。徒者於原役之所。依所犯杖數年限。決訖應役。毋得過四年。次圖七。曰笞。曰杖。曰訊杖。曰枷。曰杻。曰索。曰鐐。笞大頭徑二分七釐。小頭減一分。杖大頭徑三分二釐。小頭減如笞之數。笞杖皆以荆條為之。皆臀受。訊杖大頭徑四分五釐。小頭減如笞杖之數。亦荆條為之。臀腿受。笞杖訊皆長三尺五寸。枷自十五斤至二十五斤止。刻其上。為長短輕重之數。長五尺五寸。頭廣尺五寸。杻長尺六寸。厚一寸。男子死罪者用之。索鐵為之。以繫輕罪者。長一丈。鐐鐵連。

環之以繫足。徒者帶以輪。作重三斤。又為喪服之圖。凡八。族親有犯。視服等差。定刑之輕重。其因禮起義者。養母繼母慈母。皆服三年。毆殺之。與毆殺嫡母同罪。兄弟妻皆服小功。互容隱者。罪得遞減。舅姑之服。皆斬衰三年。毆殺罵詈之者。與夫毆殺罵詈之律同。姨之子。舅之子。姑之子。皆緦麻。是曰表兄弟。不得相為婚姻。大惡有十。曰謀反。曰謀大逆。曰謀叛。曰惡逆。曰不道。曰大不敬。曰不孝。曰不睦。曰不義。曰內亂。雖常赦不原。貪墨之賊。有六。曰監守盜。曰常人盜。曰竊盜。曰枉法。曰不枉法。曰

坐贓。當議者有八。曰議親。曰議故。曰議功。曰議賢。曰議能。曰議勤。曰議貴。曰議賓。時太孫請更定五條以上。太祖覽而善之。太孫又請凡與五倫相涉者。宜皆屈法以伸情。乃命改定七十三條。具寬恕篇二十四年七月。命刑部凡犯法者。不許誣引良善。違者所誣。雖輕亦坐以重罪。二十六年。定應充軍者。大理寺審訖。開付陝西司。本部置文簿。註姓名年籍鄉貫。依南北籍。編排甲為二冊。一進內府。一付該管百戶。充軍如浙江。河南。山東。陝西。山西。北平。福建。直隸。應天。廬州。鳳陽。淮安。揚州。蘇州。松江。

常州。和州。滁州。徐州人。發雲南。四川屬衛。江西。湖廣。四
川。廣東。廣西。直隸。太平。寧國。池州。徽州。廣德。安慶人。發
北平。大寧。遼東屬衛。有逃故。按籍勾補。明史刑法志曰。初制流罪三等。視地遠近。邊衛充軍。有定所。蓋降死一等。惟流與充軍。為重。然名例律稱。二死三流。各同為一減。如二死遇恩。赦減一等。即流三千里。流三等。以大誥減一等。皆徒五年。犯流罪者。無不減至徒罪矣。故三流常設而不用。而充軍之例。為獨重。律充軍凡四十六條。諸司職掌內。二十條。則洪武間例。皆律所不載者。其嘉靖二十九年。條例。充軍凡二百三十三條。與二十八九年。頌皇明祖。萬歷十三年所定。大畧相似。又
訓。禁用黥刺。剝劓。閹割之刑。臣下敢以請者。置重典。又
皇親。惟謀逆不赦。餘罪宗親會議。取上裁。法司祇許舉

奏。毋得擅逮。三十年五月。作大明律誥成。命刑官取大
誥條目。撮其要畧。附載于律。凡榜文禁例。悉除之。除謀
逆及律誥該載外。其雜犯大小罪。悉依贖罪律論斷。編
次成書。刊布中外。自律誥出。而大誥所載諸峻令。未嘗
輕用焉。惠帝建文四年。時成祖已即位。令徒罪囚人。充撥國子
監膳夫。八月。定罪人輸作之例。笞罪五等。每等五日。杖
罪五等。每等十日。徒罪准所徒年月。加以應杖之數。輸
役。流罪三等。俱役四年一百日。雜犯死罪。工役終身。九
月。定功臣死罪減祿例。免三死者。初犯減二十之七。再

犯減十之七。三犯盡奪免二死者。初犯減十之五。再犯盡奪免一死者。一犯盡奪。又令雜犯死罪。及流罪。挈家赴北平種田。流罪三年。死罪五年。後錄為良民。其徒罪令煎鹽。杖罪輸役如故。仍選徒罪以下罷職官。假以職名。俾督民耕種。三年有成績。實授無成。仍坐原罪。永樂元年二月。定誣告法。凡誣三四人者。杖一百。徒三年。五六人者。杖一百。流三千里。所誣重者。從重論。誣十人以上者。凌遲梟首。家屬遷口外。又定凡監生犯公罪。依律記過。私罪當笞者。罰歷刑一年。當杖者。斷發充吏。准吏

員資格出身。三年三月。定文職官及中外旗校軍民人等。凡犯重條。依律科斷。他如私度關津。臨事避難。私和公事。失火犯夜。私造斗斛秤尺。失囚囑託公事。求索取受財物。收養畜產不如法。居喪嫁娶。匿稅。諸不應為而為。一應註誤連累。則免決記罪。其有不應侵損于人等項。及情犯重者。臨時奏請。六月。命官犯杖罪者。再犯仍記罪還職。停俸三月。三犯論如律。十二月。定制。凡徒流發充軍者。於長安左右門。造守衛官軍飯食。漢趙二府牧馬。不充軍者。充國子監膳夫。將軍軍伴土工。或于

北京為民種田。遵化炒鐵。或自買船遞運。或擺站運鹽。笞杖罪止鑄錢准工。四年七月。申誹謗之禁。十月。申匿名文書之禁。五年五月。嚴禁回回多買中國妻妾子女出境者。按律處死。十年正月。令誣告犯徒流等罪者。免罪。挈妻子徙盧龍山海永平小興州為民種田。十六年十二月。諭法司。凡官吏犯贓者。必論如法。十八年二月。諭甘肅總兵官陝西行都司所屬軍士。有犯笞杖徒流遷徙罪者。就發本地極邊處。瞭守烟墩。其為事官以下犯死罪者。送京師。十九年七月。嚴自宮之禁。二十二年

十一月。

仁宗已即位

命內府守衛官軍懸帶銅牌。無牌者依

律論罪。借者及借與者罪同。仁宗洪熙元年十月。令凡吏犯徒罪以上。准工滿日安置別郡。死罪如律。公罪附過。杖罪除坐累註誤。依律的決。還役。其受贓及誣取人財。考滿丁憂不赴部。避役逃亡。詐稱疾病者。仍依永樂中事例。免杖。發北京為民。十一月。詔法司。凡軍匠犯竊盜者。杖一百。常帶鎖鉗赴工。宣宗宣德元年五月。令貴州土人雜犯死罪。役作終身。徒流徙杖者。依年限役之。應笞者。役五月。應杖者。役十月。畢日釋放。二年。令匠役

雜犯死罪。鎖鑊終身工役。徒流笞杖罪。論年限工役。二月。勅自今犯不孝及蒸父妾。收兄弟之妻。敗倫傷化者。在外有司。毋擅斷決。悉送京師。如律鞫治。若武官及其子弟犯此者。不許復職承襲。四月。嚴越訴之禁。有機密重事。許實封進呈。若私事論訴。必自下而上。擅動實封者。法司治之。并究教誘之人。皆坐罪。家屬戍邊。五月。申明原告在逃。被告放遣。俟獲對理之制。六月。罷文職官犯贓贖罪例。先是官吏犯贓。律應死者。運磚畢。罷為民。徒流者。官降用。吏改撥重歷。非犯贓及笞杖者。還職役。

至是。俱依律科斷。不復引例。英宗正統元年正月。令自今以婦女殘疾老幼。出名告狀。坐誣者。不准收贖。追究壯丁坐罪。三年三月。詔民訟母許。撫拾妻女。婦女非犯奸惡殺人。及毀罵舅姑不孝等罪。毋得提問。四年八月。勅法司論獄。妄援重律者。以變亂成法罪之。五年三月。令囚充隸富戶。逃者捕獲充軍。六月。令凡內外軍官。尅減糧五十石。布五十疋。棉花一百斤以上者。論死罪。官充軍立功。總小旗充軍守哨五年。滿日還役。其計贓四十貫以下者。論徒流罪。官稱為事官立功。總小旗充軍

充軍例下注具雜初制之從之
刪下接六年

守哨。流罪四年。徒罪照年限滿日各復職役。調邊衛差
操。九月。命盜采銀礦。為首者處斬。從者發戍雲南。十月。
令軍丁力士犯盜者。依例戍邊。十一月。更定受枉法贓。
充軍例。初制。凡官吏人等犯枉法贓者。不分南北。俱發
北方邊衛充軍。至是三法司言。洪武定律時。鈔貴物賤。
所以枉法贓百二十貫。免絞充軍。今鈔賤物貴。若以物
估鈔。輕重失倫。今後文職官吏受枉法贓。比律該絞者。
估鈔八百貫之上。俱發北方邊衛充軍。其受贓不及前
數者。視現行例發落。從之。六年七月。令免立竊盜牌額。

先是。以竊盜黥刺之刑。不足示懲。扁其門曰竊盜之家。
至是罷之。八年七月。命竊盜已刺遇赦。再犯者依常例
擬。不論赦。仍通具前後所犯以聞。九年六月。命受財教
唆。捏告平人者充軍。十年二月。申嚴誣告之禁。誣十人
以上者。軍發邊衛。民遷口外。十二年。令凡以後妻所攜
前夫之女為子婦。及以所攜前夫之子為婿者。並依娶
同父異母姊妹律。減等科斷。十三年六月。令凡姦義男
婦。比姦前夫之女。應徒男與婦仍歸本宗。強姦者處斬。
十四年六月。令凡生員犯輕罪者充吏。其受贓姦盜。冒

二年之為民刪

天順元年加英宗漢辟

籍科舉挾妓飲酒。居喪娶妻妾等罪。南北直隸發充國子監膳夫。各布政司發充隣近儒學齋夫膳夫。滿日原籍為民。廩膳仍追廩米。景帝景泰元年八月。詔為事充軍者。悉照宣德十年詔書事例。止終本身。二年八月。令有誣告軍官及子孫輩。犯敗倫傷化。圖其官職者。發原籍為民。五年三月。令各省遇蠻夷人有犯。若係真犯死罪。依律處決。笞杖罪的決。發還本部族。徒流并雜犯死罪。照工匠樂戶及婦人犯罪例。各決杖一百。餘罪收贖。亦發還本部族收管。天順元年四月。增修錦衣衛獄。

按自太祖一條全刪

按自太祖焚衛刑具。詔內外獄俱歸法司。成祖寵幸紀綱。令治錦衣親兵。復典詔獄。綱偕其黨數人。緣借作奸。後綱族誅。其徒稍戢。而錦衣典詔獄如故。英宗時。王振用指揮馬順。流毒天下。權勢復張。循至天順之末。而禍益烈矣。○憲宗成化元年。詔武臣有罪者。論如正律。後仍舍律用例。如舊制。四年二月。命凡犯賭博者。分別輕重。為三等治罪。六年二月。令凡盜在京城闕廂行劫者。於京城百里外衝要處梟示。三月。禁放官債。凡假姓名。誑財物者。事發。枷號部門。三月。發烟瘴充軍。七年十二

廣刺外等下接伏讀
御批通鑑輯覽曰自永樂設東廠
寄官官以訪緝之任固已作法于
涼至憲宗信任汪直復為特設
西廠勢焰益橫其初不過舉發
曹刀明殺人事嘉其摘奸孰知
此正若輩先為小忠小信以成其
大不忠大不信之故智憲宗其
術中深相倚毗自此廠衛乘時竊
柄日漸恣肆迄于危亡追論亂源
憲宗豈得辭作俑之咎邪
聖訓煌煌于小人得君之伎倆及
人主取下之大權固不洞探原本
有以形萬古之炯戒云以上
初成祖之復開東西廠刪

月。令凡官司於軍民詞訟。悉依律問擬。擅自科罰者治
罪。十三年正月。始置西廠。命太監汪直督錦衣官校百
餘人。廣刺外事。初成祖設東廠。令宦官嬖暱者提督之。
緝訪謀逆妖言大奸惡等。至是別設西廠。所領緹騎視
東廠倍之。自京師及天下。旁午偵事。雖王府不免。屢興
大獄。冤死者相屬。五月。大學士商輅疏直十罪。乞革罷
以安人心。會九卿連疏。列其過惡。帝不得已罷之。然眷
直不衰。仍令密出外刺事。未幾。詔復開西廠。十四年九
月。定職官隱匿盜賊罪例。一二次不報者停俸。三次戴

兵馬司下加處畫具雜若赦之
坐罪刪

罪。俱捕盜如故。四次以上。奏請降等用。十六年九月。令
凡犯罪充軍病故者。例終本身。各衛毋得因原問官司
移文。仍一概按名清勾。以戶丁抵補。十一月。以京城多
盜。勅究舍匿遊民。與無籍軍匠罪囚。送戶工兵三部收
役。其無籍貫者。送兵馬司。若赦宥死囚。遣而逃歸者處
死。仍追究舍匿之家。有司勘實造冊。有隱蔽者坐罪。十
七年五月。定挾詐得財罪例。凡指京官並三司以下官
名。及以官府使用為詞。誣財者。俱計贓。不分首從。悉連
屬發邊衛充軍。原係邊者發極邊守哨。職官有犯。依律

奏請一體發遣。十八年三月。罷西廠。時汪直監軍大同。料道交章奏西廠紛擾。重傷國體。大學士萬安亦言其不便。乃罷之。十九年十月。定竊盜三犯罪例。凡三犯計贓滿百貫者。當絞斬罪。雖係雜犯。不准常例。其不滿貫犯徒流以下罪者。雖至三犯。原情實輕。仍依常例治之。孝宗弘治三年十二月。令自後有奏議條例者。法司會議斟酌。奏請上裁。五年七月。詔以前後奏准事例。分類編集。通行中外。六年五月。令審錄錯誤者。以失出入論罪。其受賄及任已見者。以故出入論罪。七年三月。申明

酷刑條例。降調邊遠。其法外刑人致死者。除名為民。巡撫等官。嚴加防察。依法問擬。奏聞處治。十二月。令凡誣告人罪。年在七十以上。十五以下。及廢疾者。依律論斷。例應充軍。瞭哨口外為民者。仍依律發遣。若年八十以上。及篤疾有犯。應永戍者。以子孫發遣。應充軍以下者。免之。十一年正月。民有兄亡妻其嫂者。詔以絞罪定擬。仍通行中外。有犯此類。及親屬相姦者。如之。十二年二月。詔凡各州縣預備倉儲。虧耗不及百石者。從常論罪。責償。其有侵盜虧折百石之上者。從重論罪。六月。令自

後兩廣及雲貴四川犯應遣發者悉改撥本處附近衛所充軍。不欲者仍口外為民。九月以鎮巡等官於廣寧開原撫順三馬市減價抑勒夷人申明禁約違者捕送巡撫究治。計贓二百貫以上者頭目僕從人等發極邊衛充軍。職官調別邊各衛遇赦不宥。因而激變引釁者從重論。又嚴禁分守等官并勢家與海西建州胡人聯親抵易貢馬。犯者按問治罪。遇赦不宥。十三年二月詔增修歷年問刑條例。經久可用者二百七十九條。又嚴私通朝貢人之禁。有違例將軍器貨與夷人者問斬。私

通往來投託買賣及撥置害人透漏事情者俱發邊衛充軍。十六年十月詔凡威逼祖父母父母死者依毆父母律斬決不待時。十一月令決囚有抱訴鼓狀者於午前封進。午後不許重訴。十七年二月令有收藏妖書者許半月內首告。官司私錄者同罪。四月令凡軍職犯事被提監故病故未復職者所犯係人命失機及宿娼等事。子孫承襲俱照例改調別衛。其徒杖等罪不分已結未結免其降調。閏四月禁軍民奏訴。泛及七八人以上及撫入旁事者不得准理。仍治其罪。又凡強屯民田至

五十畝以上者。軍改發邊衛民遷口外為民。五月。令凡外官用刑。因而致斃。及因公挾私。淹禁平人致死者。均依酷刑例為民。充軍賄脫。除本犯坐罪外。追究賣放之人。從重叅問治罪。操備人等犯笞杖罪。俱令贖鈔。其無力贖者。即依在逃律的決。嚴勦戚家人。倚勢擾民之禁。凡生事害人者。除真犯死罪外。徒以上。于所犯地方枷一月。發邊衛充軍。情重并逃回再犯者。枷三月。發遣家長。故縱及官司畏避者。通行叅奏。又命令後有年七十以上。十五以下。及有疾人。真犯死罪者。奏發充軍。徒流

以下合充軍者。本身自犯。聽收贖。有壯丁主使者。罪坐主使之人。六月。令凡軍民奏訴牽緣別事。撫拾原問官者。立案不行。所奏事仍令問結。虛詐者擬罪。如果原問官枉斷。亦罪之。八月。令天文生犯罪當充軍者。果習業已成。如例發附近衛充軍。仍于欽天監應役。其習業未成者。仍發邊衛充軍。十月。令自後凡故殺鬥殺。正犯坐擬斬絞。其本非同謀。但不勸阻者。止問不應杖罪。竊盜臨時拒捕。雖不得財。亦坐以斬。十八年二月。以南京決囚刑科例不覆奏。均俟秋審後類奏定奪。如有巨憝難

循常例者。更具奏處決。正德元年。復設西廠。五年三月。令凡軍犯已故無子。婦女家屬。一應免遣。死罪重訴。三次者。免加罪。婦人無夫者。免配邊軍。凡犯罪家產。除重罪外。免沒官。十年六月。詔問刑衙門。凡徵收部解官物。未入官。而有司侵盜者。俱照侵盜倉庫例科斷。故縱者。坐之。十三年九月。嚴子弟劫父兄者罪例。十四年二月。廷杖修撰舒芬等。具峻酷篇按洪武中。永嘉侯朱亮祖。工部尚書夏祥。皆斃于鞭笞。廷杖之刑始此。正統以還。殿陛行杖。習為故事。至正德四十餘年間。杖殺朝臣。倍蓰。

小注下直接十六年
按語全刪

前代。雖其末流之弊。而亦太祖貽謀不慎。有以啓之歟。○十六年十二月。令自今各將領于所轄官軍。除臨陣退縮。許用軍法外。其餘有犯。止用常刑。違者聽撫按糾舉論罪。世宗嘉靖元年。令決囚准于未刻前畢事。三年十一月。詔今後除反逆緣坐外。凡減死永遠充軍。未遣而死獄者。俱免勾補。五年九月。申明訴寃之例。如各犯所訴得實。原問官從重究治。容情不叅奏者。一體治罪。至民人寃抑。止許赴通政司。或登聞鼓下投遞。有擅入禁門叫訴。及撫拾辱罵原問官。挾制官吏者。并主使之。

人重治之。六年七月。令天下有罪應充軍者。斟酌律例。從宜編發。遠不過三千里。程不過一二月。無使軍人走死。解戶貽累。九月。詔凡貪官寃獄。仍舊例責法司究治。有徇情曲法者。聽廠衛覺察。盜賊奸宄。責在廠衛。亦必送法司擬罪。七年正月。罷官校提人之制。四月。詔自後捕官軍職。妄殺報功者。依故殺抵罪。八年三月。詔今後官吏犯枉法贓者。追贓入官。仍問軍發遣。酷刑致死人命。雖因公。亦照例為民。其故禁故勘者。論如律。十五年七月。詔自後有犯辜限外人命者。俱遵律例議擬。奏請

即無之擬罪三行刪
印信下接及詐為各衙門關
防者俱依律杖流

定奪。二十年十月。詔自後有私以首功相鬻者。不分受財與否。俱問發充軍。二十二年二月。令自今犯偽茶五百斤以上者。本商與轉賣之人。俱謫戍近衛。原係近衛者。調邊遠。主家匿偽茶至千斤以上者。亦依前例編發。其不及數者。比私鹽律。四月。定偽造文書事例。凡盜用印信。即無押字。依律杖流。若止犯押字。不必槩用此律。又詐為各衙門關防。及盜用棄毀者。俱同盜用印信擬罪。二十八年。增修問刑條例二百四十九條。二十九年五月。更定充軍之制。以罪之輕重。權地之遠近。邊衛以

本省擬配。邊遠以隔省擬配。極邊以再隔省擬配。如內省無邊方者。以隔省附近邊方擬配。邊衛其邊遠極邊亦依類遞配。三十四年二月。令凡姦總麻以上親之妻及妻前夫之女。同母異父姊妹者。發近衛充軍。婦女離異歸宗。聽夫嫁賣。凡用財冒襲軍職者。并保勘官俱罷職。揭黃。永不得襲。若有賊。以枉法論。凡宗室悖逆祖訓。出城越關赴京者。奏請降為庶人。仍送回軍職犯死罪及充軍者。子孫俱不許襲。沿邊總兵以下官。凡有科斂入已。贓至二百兩以上。戍邊。四百兩以上。梟示。沿邊沿

海寇至不能固守。致賊陷入衛所。掌印官與捕盜官俱比守邊將帥失陷城寨律斬。其府州縣降級別用。無衛所專城之責者。不分邊腹。掌印捕盜官俱比牧民官激變良民。因而失陷律斬。凡搶奪財物。至三犯不悛者。俱比照竊盜三犯。應絞律擬絞。奏請定奪。凡軍職倚勢役占。并受財賣放餘丁。至三十名以上。致廢防守。俱比賣放正軍。包納月錢。至二十名以上。事例。罷職戍邊。穆宗隆慶三年正月。詔買休賣休和娶人妻之條。非係姦情。不得引用。五年四月。令以律書諸家注解。折衷定論。參

以續定事例。附條例之後。刊布中外。六年正月。令刑部申飭諸司。參酌律令。可矜可疑。務剖析情罪。毋致牽混。又申飭問刑官。毋得輕入。恤刑官。毋得輕出。神宗萬曆三年五月。嚴禁三司首領州縣佐貳官。貪污不職。除照例追贓。問遣外。正官不行舉報者。倣古連坐法。參論罷黜。九月。申嚴貪酷之律。凡守令贓私顯著者。追贓押發各邊。自行輸納。完日回籍為民。官吏因受人財。及法外用刑。增減人重罪至死者。坐以死罪。五年八月。申明捕盜之禁。先是。命有司隱匿盜情。反累失主者。參奏重治。

至是。復申明其禁。六年七月。令凡捕役冒功。仇家攀陷者。辨釋治罪。十二月。以錢法壅滯。詔有犯私鑄。及倡言阻撓者。為首依律論死。餘各問罪。七年三月。令凡侵盜銀四百兩。糧八百石者。論斬。一年完贓。改戍。過限不完處決。仍拘親屬追賠。至十一年六月。復舊例。侵盜者永遠充軍。五月。詔以廣東珠池之盜。比常人盜官物。併贓論罪。免刺。仍分為三等。拒捕者。不分首從。俱遠戍。若因而殺傷人。為首者斬。其未拒捕。聚眾二十人以上。珠值銀二十兩以上者。為首者戍。為從者枷號三月。人與珠不及數者。為首者初

犯枷三月。若以盜珠為由。行劫市舶。俱依強盜論。八月。詔以衛所職官。賣放正軍。包攬月糧至二十石以上者。例罷職發邊衛守禦。沿邊副總等官。科斂扣減。贓至二百兩以上者。例發邊衛永遠充軍。四百兩以上者。例斬首示眾。自今沿海地方。犯者照此究處。十二年五月。定貪官計贓論罪條例。凡贓至五百兩以上者。即引枉法例。若止因公科斂。第依律以雜犯絞罪准徒。十三年四月。輯嘉靖三十四年以後詔令。及宗藩軍政條例。捕盜格。漕運議單。與刑名相關者。律為正文。例為附註。凡三

百八十二條。頒行之。十四年九月。詔軍官軍人犯徒流律。並免刺。以後文職一體遵行。其餘但以盜論。及雜犯斬絞准徒者。俱盡本法刺字。十二月。令凡盤查坐侵等項。准照舊免刺。十五年十月。令凡官民之家。立券用值。工作有年限者。以僱工人論。受值微少。工作計日月者。以凡人論。若財買十五以下。恩養日久。十六以上。配有室家者。視同子孫論。或恩養未久。不曾配合者。庶人家。仍以僱工人論。縉紳之家。視奴婢論。又凡遇竊盜三犯。俱在赦前赦後者。依律論絞。或赦前後所犯。并計三

次者。奏請定奪。錄官附入矜疑辨問疏內。并與改遣。又強盜有贓証未明。遽難懸斷者。俱擬秋後斬。以待平反。又同謀共毆人致斃。遇犯人中。有在家病故。且在數年之後者。即將見監下手之人。擬從矜宥。是以病亡之軀。而抵毆死之命。殊屬縱濫。以後毋得一槩准抵。又在外省有子殺父。弟殺兄者。毋拘類奏之例。准御史單詳到院。院寺單奏。決單一到。即時處決。其死者下府州縣戮其屍。三十七年四月。增定失陷從賊罪例。凡大小文武官員。被賊攻陷城池。不即拒敵。輒怯死從賊。導引焚劫。

有顯跡者。斬。秋後處決。三十八年六月。定軍職犯盜自首降襲事例。凡自首免死者。應襲之人。降一級承襲。熹

宗天啓三年十二月。魏忠賢提督東廠。具峻酷篇七年十二

月。時愍帝已即位令法司等衙門究治罪人。按律用本等刑具。

永草大枷。不得復用。愍帝崇禎二年三月。定逆案。時魏忠賢等皆伏誅。帝命刑部尚書喬允升等。審定奸黨。自崔呈秀以下。定為六等。詔示天下。十一年。定編遣事宜。以千里為附近。二千五百里為邊衛。三千里外為邊遠。其極邊烟瘴。以四千里外為率。止拘本妻。無妻則已。不

許檀勾親鄰如哀痼老疾准發口外為民

